



Abb. 52

3033

Eyn außzug etlicher

Practica vnd Propheceyen. Sibille.

Brigitte/ Cirilli/ Joachim des Abts/ Methodij/ vñ Bruder Reins
hartz/ wirt weren noch etlich jar/ vñ sagt vñ wunderlichē dingen.





Stolome^s ein hochgeachter mayster

des himels lauffs / mit sampt andern in der kunst der Astronomie
Auch die philosophi der natürlichen kunst / Auch tegliche erfahrung
lernet vns das / Auch der heylige Augustinus in dem buch vñ der
heyligen stat gottes genant / ziehent alle zu gleych vber ein / vñ hal-
ten das der himel / nach got der aller ding ein schöpffer / herr / künig
vber alle künig ist / vnd die bewegligkeyt der gestirn regiren vñ ver-
keren die leybliche creatur der welt / welcher ergeung ist geschriben
im himelischen Circel / vnd in dem anplick des himels / vñ nichts
irdisch erfunden das nicht ein gleichformig sach am himel het / der
halben ist nit an zunemē das thöret geschrey der bösen mē / chen / die
als vnweyßlich zu banck haroen / vnd reden wider die meyster der
Astronomie / auch wider die selbigē kunst / welche doch vñ vernß
kōndt erkennen vnd den menschen zu gut offenbaren maniche zu-
künfftige geschickligkeyt diser welt / In welcher man got loben vñ
eren sol / vnd inn bitten das er von vns wöl wenden alle schedliche
ding / die vns vber Jar betreffen möchten / eintweders durch krieg
krancfheyt vnd vngewitter der monat vnd der tag. Der halben /
sintemall got in der ewigkeyt alle ding geschaffen hat vnd verorde-
net zu nutz der mēschen / So soll billich kein mensch zweyfein / sun-
der vest halten / das durch die ewige weißheyte gottes der lauff der
gestirn vñ die bewegligkeyt des grossen ichönen vñ weyttē himels
vnd zu gut beschaffen ist. Auff das wir nichts gedencken / oder be-
ginnen vnvorsichtiglich solten / sunder das wir auß dem wunder-
barlichen einfluß der Planeten vñ anderer gestirn erkennen die
zukunfft manicher ergeung durch windt / regen / vberflüssigkeyt in
Jaren / tewrung / seuch / gesundtheyt / krieg / oder gutten fride / Auff
das man kōndt ratz pflegen / sollichem vnglück vor zu kummen zu
geteühung der gemein / vñ enthaltung Künig Fürsten Landt vnd
Stet / Demnach solt man billich groß vorhaltē die kunst der Astro-
nomiey / dardurch wir erkünden gegenwertige ding / vñ in die ver-
nunfft widerumb bringen die vergangen / Auch die verkunntig der
zukunfftigen ding / welcher zukunfft ein künst erfarnet der Astro-
nomiey nützlich / warhastig anzeygt auß natürlichen sachen / dan
sein künst ist ein regel vnd ein gerzeug / welches offenlich entdeckte

die werck/die do erscheynen auß der natur/stell der Planeten vnd
zeychen des Circkels der thier/in welchen sie iren gewalt haben vñ
sie üben/ Der halben Christus die götliche warheyt Bezeygt mit
nachuolgenden wortten/wan kumen wirt die verenderüg so wer-
den zeychen in der Sunnen/Mon/vñ gestirn gescheen. Auch helet
der lerer Guido Bonati/vñ ist mir glaublich das christus darumb
zu seinen jüngern gesagt hat/do er widerumb wolt ziehen in das
Jüdische landt/Seind nicht zwelff stundt im tag/Als ob er wöl-
te sagen/Ein stundt ist böß/darinn die vermaledeyten jüden ein ver-
kerren willen trugen wider in Christum den almechtigen got vnd
schöpffer der welt. Auch ist ein gutte stundt/die er erwölt hat vnd
ist zu in gegangen. Auch die heyligen altueter Abraham vñ Moyses
haben sunderlich arbeyt gehabt auff die ordnüg vñ vierteyl schein
der Planeten vñ lauff der himel fleysig verhalten vnd erforscht.

Nach Kayser Friderich dem dritten
wirt so grösslich vberhandt nemen die vngerechtigkeyt vñ vntrew
vñ grosse verfolgüg/das vnter Kayser Friderich dem dritten frid-
lich gewesen ist/gegen der zeyt die yetz ist vnd noch wirt/Da von
der Psalmist sagt. Oberflüssigkeyt des fridē wirt vō dan genumen
so lang biß der Mon von dan genumen wirdt/das ist das heylig
Römisch reych. Da von spricht Paulus der apostel. Ir solt wissen
das in den letzten tagen werden kumen ferliche zeyt/so sie vor nie
gewest sein. Es wirt sollicher iamer vnd betrübnuß werden. xxiiij.
Jar. Darumb so forchtet got/vñ erent das Römisch reych/wann
wan das Römisch reych vergeet/so muß von not wegen die welt
zergeen. In diser zeyt wirt vberwintlich ein Franzos/vil teütscher
erschlahen. Zum letzten wirdt der Franzos vnter ligen/Vnd der
Keüsch am angesicht wirt regieren an allen enden/vñ behalten das
regiment von Orient biß in Occident. Vnd vnter disem Kayser
sollen geendet werden die anfechtung der geystlichen.

Von etlichen Coniunction was yeg-
liche bedewt hat vnd noch bedewotten sol.

¶ Der eine ist gewesen in der wesserechten triplicitet/ Im Jar des heyls. M. CCC. vnd. lxxv. Im achten grad Scorpionis volendet/ vnd zwey die vergangen seind/ vnd aber ander zwey der selbigen nach volgent in der lufft triplicitet/ im Zwilling vñ dem Wasserer gewesen seind. Die dritte nach denen ist gewesen im Jar der gnaden M. CCC. xxv. wider in des Wasserers triplicitet/ Im. xiiij. grad des Scorpionis/ vnd ist biß auff. M. CCC. lxxviiij. Jar darinn gewesen/ vñ ist vast erkleret/ das ein prophet geboren sey wordē/ ich meyn der Sophy sey es in Persia. Wider zu erkleren von etlichen Constellation/ was sie gebracht haben vnd noch bringen werden in nach kumenden Jaren/ dann die grosse Coniunction im Scorpien/ vnd dem bild Erodiam/ Vnd so handt ein newe sect funden die ketter mayster von Behem Wickless/ Johānes Huss/ vnd Rokensan. Aber die yetzund Coniunction im. M. CCC. lxxviiij. vnter dem erschroffenlichen bilde des angeprandten/ dardurch wir die Römisch Kirch versten/ die leyder leyden wirdt/ die geystlichen. Darnach wirt eine kumen vō Wasserer/ dardurch das Römisch reych wirt auffhören vnd abnemen/ vnter dem bild Alporas. Vnd darnach im Steynbock werden wir ein andere sehen/ vnter dem bild des Adlers/ dardurch das reych wirt zerschliessen in zehen teyl Auch wirt ein andere kumen in der Wage/ darunder wirt geborn von dem geschlecht Dann/ ein kindt das vil böses thun wirt/ wann etliche meyster rechnen yetzlichen Planeten tausent Jar regieren/ mit hilff der andern. So wirt es noch vber zwey. CC. vnd. lxxviiij. Jar/ sibentausent Jar gerechent. ¶ Nach der geburt Jesu Christi M. CCCC. xv. dan sol kumen ein reynigung der welt.

*Anhänger des
gibt.
freulich ist
gottselig
d. Luffen*

¶ Vil glantz der kirchen werden dunckel werden/ da selbs in Tentischen landen/ vnd in Franckreych/ dann die zukunfft des selbigen Königs wirt kumen on zeychen/ wann er wirt sprechen/ Frid vnd sicherheyt sey denen die im reych wandeln/ so wirt vber sie kumen ein schneller vntergang.

Erzellung etzlicher Jar.

¶ Wan man zelt. M. CCCC. xvj. xviiij. vnd. xviiij. Jar/ so wirt vil



terworung gegen Orient/ vnd grosse angstperkeyt der selbigen herr-
schafft/ vnd wirt gut in Occident. In Ungern Behem Merheren
Polen vnd Meychssen/ vnd da vmb wirt grosse anfechtung. dan
wirt in Occident gut glück erscheynen/ Aber die von Orient werde
vil vnbequemer ding leyden/ das Zepter des ganzen vnglück wirt
vber sie kumen. Vnd ich glaub das die Kirch von Prag/ mit dem
Constantinopolitanischen reych auff die zeyt wider gebracht soll
werden zu der mütter der glaubigen/ vrsach der tribulation/ dann
vil werden streben wider sie beyde/ Löwen Vögel vnd auch Thier.
auff dem mittag vnd der mitternacht vñ von der juncckfrawlichen
erden. Vnd wirt ein newe widerbringüg vnd schickung vnter den
Iouisten vnd regierern der Kirchen.

So man zellen wirt. M. CCCC. xxiij. vnd. xxiij. gar nahent funff
Jar/ wirt wider kumen böse zeyt/ hunger/ kalte zeyt/ lange wintter/
Vnd gen Occident mit einer schnellen pestilenz/ vñ die rinder wer-
den sterben/ Es wirt so seer kalt sein/ das die vögel in walden vnd
vnter den dechen sterben werde/ vñ die thier werden in den walden
hungers sterben/ Vñ wasser wirt werden im Summer/ Vnter den
Pawri vñ vnedeln wirt ein verpindnuß gemacht wider die edeln
vnd mechtigen/ die newe ding dem volck an müten die vor nie mer
gehört seind. Vnd vill mechtiger werden hoch herab fallen. Vnd
vnter den Chürfürsten des reychs wirt entsten vngehörte vneinig-
keyt/ O leyder dan werden die Kirchen leyden/ Die geystlichen wer-
den betrübt an vil enden des Keyns. Vñ die Fürsten von Occident
werde versuchen vil Schloß vnter sich vñ iren gewalt zubringen
O we grosse verreterey/ kein glaub wirt sein in den gewaltigen. Es
wirt ein newer auffsteen/ der wirt reformirn vil in der kirchē/ nach
langer vneynigkeyt. Der geystlich standt wirdt trawren/ dann sie
werde verlieren vil gottes lehen/ vñ werden ein genügen haben in
wenig/ nit als bey sant Siluesters zeytten/ der die Kirchen reych ge-
macht hat.

¶ Darnach wirt steen der reyn vñ die geystlichen in guetern friden/
vñ die vneynigkeyt vnd gezencf wirt abgenumen von in/ vñ wirt
ein newe Reformacion/ ein new gesetz/ vñ ein new reych/ ein erlich

zichtig leben/ beyde in geystlichem vñ weltlichem standt/ vñ allein die bey dem Nere werdē trawren sunff Jar lang. Vnd der Türck in seinen letzten Jaren seines Regiments in Occident inhaben die anstossenden landt/ vñ wirt mit verr vō Cölen todt geschlagē. Vñ das reych von Drabisund wirt durch die Creützer wider bracht zu dem veterliche erb chusti. Vñ die teütschen Jovisten vñ die Ritter des Creütz werden wider bringen Preysen mit den anstossenden landen/ zu irem aygenthumb. Vnd die Polen vñ Reüssen werden leyden einfall in irer substanz/ vñ verlierung ired gutes in iren landen. Vnd Saturn⁹ selbs mit dem Mars wirt umbtreiben als mit gölichem rach die ihenen die wider die kirchen streben vñ ire Ritter/ wann er vergiffe den schwanz der Vische/ vnd die hömer des Stiers in der ersten Revolution/ die yezund geschehen ist/ Vnd so werden trawen die Türckischen mit den zerstreuten von der schar der Chusten. Vnd alsdan wirt wider wachsen die kirchen in dem standt der ewigen liebe. Die Engelder vnd die von Brittanien/ mit den am Nere gen Occident/ werden leyden in iren reysen vill ferligkeyt vnd umb treybung.

¶ Darnach werdē die Römer/ Neapolitaner/ vñ die an dem Nere gen dem mittag/ krieg haben bis in Gallicien/ vnter in do wirt sein hunger vnd krieg. Vnd ein newer König wirt betrüben vil landt/ er wirt herscher von mittagischen Nere bis an das Occidentisch Nere/ dem werden vnterthan sein vil thier vñ vögel. Von tyrannischem gehorsam werden trawrig sitzen die stat Rom/ vñ ir aller heyligister Bischoff/ seuffzen in mitleydung/ das sich nahent die seyt/ darin wirt vergossen das vnschuldig plut in den landen. Die Teütschen werden sich frewen das sie handt funden ein newe einsetzung. Vnd zway hömer werden regiren in Teütschen landen. Das volck on ein haubt wirt im erwöllen ein Fürsten/ dan es wirt so grösslich gezichtigt mit dem schwert vñ mit priant/ das es wunder wirt sein. Vñ ein volck eins harten haubts wirt vnterworffen dem Römischen reych/ vñ dan wirt das Reych steen in friden bis in. M. CCCC. lxxxj. Jar. Aber hie zwischen wirt es mancherley leyde/ vrsach lass ich fallen. Davon redt Joachim in dem buch der tribulation/ das ist der umbtreybüg zu dem vall Jericho/ der welt

hoffart die bederwt das dan zerstört soll werden vill Königreych/
die do kumen werdē wider die teutschen Israheliten/aber sie wer-
den nit vnbestritten vmb Maxilianus willen/dann er wirt seinen
schild in die höhe heben/vñ habē hilff vō den mēschen vñ vō got.

¶ Vom König von Vngern/du wirst auch ein ander volck zam-
machen vnd dein letztes lob do enden. Aber nach dir wirt kumen
ein grösserer dann du bist/als ein lange geysell gottes schlagen die
vngetrewen hundert. Dise ding nemen bewerung auß dem herscher
deines landes. Vnd das volck Sagittarij wirt regieren lange zeyt/
vnter deinen chriſten/vñ das reych von Vngern wirt geben einem
andern/der wirt seer milt vñ barmhertzig sein gegen der kirchen/
vñ wirt wider zu recht setzen die kirch vō Prag/vñ sant Sophien
kirch zu Cōstantinopell/vñ wirt hoch steygen vnter den chriſten/
Aber er wirt nit sein von dem geplüt Mathiaschko/sunder vō den
hohen felszen des Teutschen landes wirt er auff geen/vñ ein purer
vnbefleckter König.

¶ In dem buch Cirilli steet/ee die kirch erneuert wirt/so wirt got
verhengen das/das Babstumb wirdt ledig steen werden/grosse
zweyfeltigkeyt zwischen dem Teutschen Kayser/der in sein macht
getrawet/widersteet zu ordnen vnd setzen einen Babst/vñ so die
Römer vnd walchen werden widersteen dem grossen Adler/wirt
der Adler im grim vñ zorn engündet/wirt nit allein die Teutschen/
sunder von allen orten böß volck zusammen bringen in sein here/vñ
mit gewapneter handt wirt er gen Rom kumen/vñ alle Prelaten
der kirchen/religiösen/bürger/vnd ander wirt er fahen/peynigen/
vnd tödten/mit mancherley peyn/darumb werden sie die platten
verscheren lassen/die andern werden fliehen in die weld vnd berg.
Zunden nach so auß gewürzelt seind die premen vnd die dören der
böien menschen/so wirt ein heylig man kumen vnd wirt fridlichen
stillen den Adler mit der kirchen.

¶ Darnach wirt kumen ein einziger man mit grosser heyligkeyt
erleucht/als Joachim im buch der einigkeyt spricht. Ein man mit
grosser heyligkeyt wirt erhaben/vñ gesagt in Römischen stul, als

ein Babst/durch den wirt got grosse miracel thun/das inn alle
mēschen werdē fürchten vñ eren/niemant wirt so kün sein/der thut
wider sein gesetz/er wirt verdānen vill gottes lehen vñ Kent/vnd
setzen das die Clerici leben vñ den zehendē vñ dem opffer/Er wirt
verbieten geschmuck der Kleyder/alle vnzüchtige ding/denze/ge
senge/vñ das die frawen seer züchtig vñ erlich geen one golt/vnd
edel gestein/vñ wirt gebieten das man predig die ewāgeli/Er wirt
steen im Babstumß kurze zeyt/diser allerheyligister man/nit mer
dann vier Jar/alsdan wirt er faren zu dem herren.

¶ Darnach bald wirt got erwecken ander drey heylig männer/ein
nach dem andern/in tugenden vnd in wunderzeychen/gleich die
die vorgemachten dinge vnd gesetze bestetigen/vnter welchen die
Kirchē wirt wider wachsen/vñ die werdē genant engelische hyrtē.

Von des heyligen mannes predig. der Französisch vñ welsch landt durchzogen ist im. M. D. viij. Jare.

¶ Davon redt der heylig man vnd prophet/der zu vnsern zeytten
welsche landt vnd Franckreych bis in Hispania durchzogen ist/
schreyt vñ spricht/Erwacht ir christen männer vñ dem schlaff der
sunden/vñ schneydet auff die bandt ewers gehörs/vnd aller ewer
sinnen. vñ vernembt meine wort mit fleysß. Darumb das ir die ge
bot gottes/vnd das götlich wort habt ab geworffen in die gruben
der vnfauberkeyt/der vergessung vnd verachtung/vñ habt ange
fangen in der übung der vntugent/nerrisch vñ nachlessig/Aber in
der bossheyt ganz weysß/listig/vñ fürsichtig zu sein/alle billigkeyt
vñ gerechtigkeyt zu verkeren/in dem schreyß vñ plut der ellenden
vnd betrüben witwen vnd weysen truncken zu werden/das hey
rat gut christi in der wollustigkeyt des leybs zu verschwenden/die
vnverschambe fleyschliche begir mit dem eebruch vñ schwechung
der juncfrawen/vñ aller vnzülicher vñ vnnatürlicher vnlanter
heyt. Widerumb ewere vnaussprechenliche geyttigkeyt mit allem
falsch/vntrewen/raubem/vñ stelen/zu ersettigen. Vnd die kirchen ist
durch ewer bossheyt worden ein hauß des raubs/dieberey. vñnd
B

m̄d̄ber̄ey/in welchem nit gesungē werde die lobgesang des herren
sunder die goḡlesterūg vñ goḡschwerung/lobgesang des teuffels.
Darumb seind noch wenig tag/vñ die ch̄ristenliche stet werde fal-
len biß zum grundt/der vrsach halben kleydet euch mit den secken/
der Buß/rew/vñ leyde/vñ von dem meysten biß zu dem minsten/
lauffent dem herren entgegen mit ewrem waynen vnd klagen/so
mag geschehen das er sich vber euch/als vber die Ninuiten ge-
schehen ist/erbarmet. So ir aber nit werdt Buß w̄rcken/werden
die tag der tr̄bsalen/angst/vñ not schnelligklich erscheynen/von
welcher angesicht ir fliechent an den gestat/Die fl̄uß der wasser
werdt ir an r̄uffen/damit sie ewer leben ḡttiglichen entpfahen/
Ir werdt die h̄he vnd die abschliff der berg an schreyen/damit
sie ewere c̄rper in der abfallūg lindlichen entpfahen vñ abwelzen.
Item ir werdt die bawm in den walden mit waynenden augen an
betten/das sie ewre helff an ire est lassen hangen/vnd von den v̄-
geln verzert/es wirt ein solch heulen vñ schreyen vnter den ch̄risten
ersten/das einer zum andern sagen wirt/wer nit besser wir weren
in mitter leyß verdilget worden. Allein es werden etliche neydische
menschen gefunden/die dise red des heyligen mans verargen w̄l-
len/ist nicht gewissers das dise vngewiter der tr̄bsalen/so ich yetz
ertzelt hab vñ noch vil gr̄awfamer als mans geschreyben kan vber
Teutsche/welsche/vnd Franz̄sische lender/nachvolgent vber die
ganz ch̄ristenheyt werden/darumb wol gesprochen mag werden/
Sant Peters schiflein hab sich an vill felffen der widerwertigk̄eyt
ganz zerkl̄oben. So aber die nat̄rlich bewegung wil auch fur ein
fabel gehalten werden/ist not das die ḡtlichen ordnungen/die nie
gefelen m̄igen/wann sie entspringen auß dem prunnen der heylis-
gen triueligk̄eyt/ein gefuert werden.

¶ Ich besorg bey dem lebendigen got/ditz sey die zeyt der tr̄bsalen
der angst vñ der not/darinnen die heyligen propheceyen sollen er-
fult vnd die ch̄ristenheyt manigfeltigklich zertr̄nischet werden/Ich
besorg es werdt vns ch̄risten ditz begegnen/das den J̄uden in zer-
st̄rung irer h̄ch vnd zier beḡgnet ist/Als die selbigen sahen vnd
horten vil seltsamer wunderzeychen an himel/wie vormalt ermeldt
ist/Keytter im lufft/mit gulden stollen vnd spießten/mit einander

scharmitzlen horten/im heyligen tempel gottes wunderbarlich vñ
erschrecklich sauß vnd bewegungen/vñ verachteten die ding alle/
Am letzten wardt die stym im zugang des tempels gehört/Wir
wollen von dannen ziehen/Bald darnach zergienß das Jüdische
reych. Ich forcht gleycher weysß als die wunderbarlich stym/Wir
wollen von dannen ziehen/bewottet hat den abzug der götlichen
gnaden vom Jüdischem geschlecht/Also die erscheynung der creutz
zeychen/so wir die verachten vñnd verspotten werden/bewotten
den abgang der selbigen gnade gottes von dem Chüstenlichen
volck. Vnd als die Barmhertzigkeyt gottes ließ solliche wunder-
werck zu Hierusalem in der haubtstat der Jüdischeyt geschehen/
Also yetz zu vnsern zeytten/leß er der gleychen wunderzeychen in
Teütschen landen/dem haubt oder dem hertzen der Chüstenheyt
erscheynen. Vñnd auch als die Priester entsunden/am ersten die
wunderwerck/vñnd in dem inderstem Tabernackel der heyligkeyt/
Vñnd die zerstörung gieng auß von dem Tempel/Also yetz and
sehen wir Priester die wunderzeychen am altar/in der götlichen
zeyt/Vñnd wir seind die ersten die dise götliche zeychen vñnd vor-
gotten verlachen/Ich besorg aller vnfall werdt vñ der kirchen auß-
geen/die ganz Chüstenheyt vmbgeben/Darumb wann wir nicht
bald vmbkeren vñ abweychen vñ dem weg der vngerechtigkeyt/
in die fußstapffen der gerechten menschen/besorg ich/wir werden
in dem werffell der trübseligkeyt extrincken/darinnen die erstockte
Jüdischeyt versincken ist. Vñnd furwar wann ir die erbarmlich
zerstörung der ganzen chüstenheyt/aller löblichen gewonheyten/
ordnungen vñnd gesetzen/das ellenden aller stende/die manigfeltig-
keyt der plagen/die verenderung der zeyt/vñnd alle seltsame zufell/
zu hertzen nembt/habt ir das liecht begriffen mit dem ir durch den
finster neßell aller beschwerüg leychtlich vber künmen/vñnd alle vn-
gefell so noch künfftig seind/scheynbarlichen sehen/darnach ob ir
wölle/auch entpflieden möge/darzu mag helffen die heylig erma-
nung/des heyligen fursprecher vñnd propheten Chüsti/in form vñ
gestalt des propheten Jone/vast durch alle Stet Franzzösischer
vñ Welscher lender predigent/die chüsten kleglichen ermanet buß
zu würcken/vñnd sich zu got zu keren/wann das endt der welt na-
hent herzu/vñnd die bech der trübsalen werden die ganz Chüsten

heyte yetz yetz ober geen/welches wort hab ich zu bewerung meiner
reden hierinnen ein teyl wöllen begreyffen/ vnd seind die.

¶ Danon redt Reinhart in seiner offenbarung/ vnd spricht. Nach
dem allem wirt kumen der letzte Türck/ der spricht er sey vō Sara
geschlecht/ Aber er ist von Agar/ vnd seine nachkümmling heysen
Agareni/ die werdē mit heroser bawen/ sūnder als wilde leüt durch
streychen die grossen wiesteney/ wonend in gezelden/ vñ leben von
rauben vnd was in werden mag/ vnd vnter den Chusten gen der
mitternacht vnd dem nidergang werden sie in übung des grimß
vbertreten alle grausamigkeyt der wilden thier/ vñ die gutten vñ
senssemütigen chusten werden von inen zerstrewt.

¶ Darzu spricht Methodius. Es ist zukünfftig das noch ein mall
die Agareni gesamelt in teütschen landen außgeen vō der wüftung
vñ erobern den kreys des erdrichs im landt des Mondes durch
acht Jar lang/ vnd wirt ir weg genant der weg Agareni. Si wer-
den Stet vñ Königreych vmbkeren/ an den heyligen stetten wer-
den sie die püester tödten/ vnd bey den weybern schlaffen/ auß den
kelchen vnd andern heyligen gefeß werden sie trincken/ vñ bey den
grebern der heyligen werden sie ire viech thun binden zu schalck-
heyte den Chusten. Vnd darnach werden sie bey Cölen alle erschla-
gen. Vnd wirt kein chustenlicher Fürst darbey sein/ allein der vñ
überwintlich Fürst vñ König von Hispania/ der den Türckischen
hunde ertöden wirt/ dan die erhebüg Saturni hat noch kein ende
Vnd der Türcken erhebung wirt nider fallen. Es werden Könige-
reych vñ Fürstenthumb zu der kirchen bracht/ dan des Schützen
kinder/ das seind die Spaniolen oder Ungern/ werden oberhande-
nemen vnter andern Chusten/ vnd veriagen die bößheyte des Sa-
turnischen Türcken/ vnd zerstören die leydigkeyte vnd iamer des ob-
gemelten vngelück's/ vnter dem eynigen Fürsten vñ kayser Maxi-
miliano/ oder dem erst gebornen Archangelis wirt kumen ein pur-
lautter schöne zeyt der seligkeyte/ dan so vnter getrücke ist alle böß-
heyte der stat vnd zeyt/ So erkent der güttig Juppiter vnd schaffe
freüde/ Vnd das Saturnus bößheyte verderbt hat/ wirt durch die
heylsame erzney Juppiters wider bracht. Vnd also wan alle suß-
stapffen der bösen ding auß gereüt seind/ vnd die Türcken vmb vñ

umb vertriben seind/so wirt man die chriſten ſehen vber Mer ſarn
vñ fliegen mit hauffen als die mucken. Sant Sophien kirch wirt
wider an ſich nemen ire ſtarcke krafft/dan wirt alle gelückliche vñ
ſelige zeyt wider kummen. Der wald Löw wirt in einem ſeyden tuch
gefuert zu der mutter der gläubigen/vnd wirt ein newe Refor-
mation/die wirt lange zeyt weren/Vnd wirt nit mer gehört der nam
des Türckiſchen Keyſers vnter den Chriſten.

¶ Vnd iſt das die Fürſten des Teütschen landes nit wilſaren mit
dem groſſen Adler/ſo werden vnter inen inderlich krieg an ſahen/
vñ wirt kummen der erb Dagloſy Jamus der. xv. Türck regierer/vñ
wirt verwüſten wollen Meychſſen/Thüringen/Zeſſen/vnd wirt
kummen in Picardey/Brabant/Glandern/vñ bey Cölen/als Mer-
linus geweyſſagt hat/erſchlagen. Diſe ding ſchlieſſent in ewere
herzen o ir chriſten menſchen.

Ein beſchlußrede diſer Practica.

¶ Darumb ſo dem also iſt/es begegnet ſo vil offenbarlicher zeychē
am himel vñ auff erden/ſo vil ſcheinbarlicher anzeygung der ver-
änderungen/ſo tapffer zeügen der menſchlichen vnd götlichen vor-
wiſſenheyt/ſo haben ſich vil der trübſeligkeyt/yez langſt an gefan-
gen/darauff die warheyt vñ die gewiſſheyt/der vorgesagten ding
mögen klerlichen ab genummen werden/wöllet/wie ich im anfang
erimant hab/erwachen/vñ auß gangen krefften verſuegen/damit
die gantz geiſtligkeyt vnd als volck/ewer vorwaltungen mit den
panzern der höchſten andacht vñ der inprüntigen lieb/helmen
der götlichen forcht/mit den ſchilden der heyligen hoffnüg/Bayn-
roren/der ſterck/mit den ſchwertern des heyligen creützes/mit den
ſackeln der waren rew/Beycht vñ Buß/darnach mit dem geſchütz
einer gutten vor betrachütig/frid/eynigkeyt/hilff vñ rat an einan-
der/gewapnet ſich auff machen/diſen vngesellen vnd götlichen
ſtraffungen zu begegnen/schnelliglich in das veld der verſünung
götlicher gnaden vnd barmherzigkeyt auß ziehen/vnd den ſtreyt
des gebets/vnd der andechtigen anrüffung des namen chriſti/der
junckfrawen Marie/vnd aller gottes heyligen/durch euch ſelbſt

anfahen ewer vnd des ganzen hymlichen heres feyndt. die bösen
sitten vnd gewonheyten/den eebruch/Bezwingungen der junck
frawen/witwen/weysen/vnd der geystlichen personen/dieberey/
mörderey/den aygen nutz/den wucher/vnd alle andere laster/mit
den waffen einer löblichen Reformation/verenderung/auffsetzung/
vnd verkerung/aller ding zum besten erlegen vnd verdilgen/zum
letzten nach der vberwindung diser feyndt/alle scharen vnd vers
samlungen/der priesterschaft vnd des volckes mit starcken heyl
samen solwercken/zewonen/vñ mauren/der verharrung vñ steten
übungen/der tugenden vnd gatten wercken ombgeben/alsdann
wirt nicht allein das reych/sunder die ganz chüstenheyt/von den
widerwertigkeytten erlediget/vnd im zeytlichen als hoch als im
geystlichen erhebt/Demnoch möge ir durch den weg kumen/an
die endt do alle die den gemeynen nutz betrachtet vñ gemert haben
mit Chusto leben vñnd herschen in dem höchsten thron der hymel
ymmer vnd ewiglichen. Amen.

¶ Alle stend der welt haben sich verkert
Darumb wirt mit plagen sie groß gemert
Die selbigen stendt seind manigfalt
Wie sie dann hernach werden erzalt
Precepta dei werden verschmecht
Membra dei mit fluchen vnrecht
Virtus wirt yetzund nichts mer geacht
Die redligkeyt nun gar wenig macht
Charitas ist ganz gestorben
Veritas an allen orten verdorben
Pax ligt in krankheyt sere
Justiciam findt man nyndert mere
Lex ist worden vberall blindt
Honor mit allem grad verschwindt
Gutter meynung seind arm alle stende
Sintemall eygner nutz den menschen blendt
Principes werden gantzlich kinder
Episcopi sehen durch die finger
Consules müssen die landt regieren

Prelaten thünt das volck verfuere
Religiosi haben nicht geystlich leben
Die Totten wollen nicht auff reformirn geben
Nobiles halten sich zu stelen vnd zu rauben
Mercatores vnd artifices halten kein glauben
Pastores begern der woll vnd nicht der schaff
Oues keren sich wenig an ire straff
Clerici böse beyspill geben
Populus thut auch darnach leben
Judices achtent alles nach gunst
Nequiciam heyst man yezund kunst
Fratres achten der regel nicht groß
Der menschen seind vil Zodome gnoff
Scelus solt nicht vngestraftt bleyben
Potentes thunsß am meysten treyben
Communitas ist selten ein
Respublica meret sich klein
Canonici prassen tag vnd nacht
Symoniam haben sie in gutter acht
Ecclesia wirt ganz übel versorget
Malicia wirt yezund geborget
Adulterium ist nicht mer schandt
Usura erwechst in allem landt
Mit der Superbia ist yederman wol
Rustici seind aller betrügligkeyt vol
Luxuria ist yezund kein schandt
Gula regiert durch alle lande
Getrawheyt ist worden klein
Falsitas allenthalben gemein
Dazu seind künen geschlichen die hypocriten
Stationarij auff grossen pferden geritten
Türcken Sarrocener vnd Behem sol man erschlagen
So wöl wir vil gütter darvon in der warheyt haben
Die ganze welt wirt also durchzogen
In conscientia mea es ist nicht erlogen
Hans Stainberger Buchfurer von Zwicken

Faint, illegible text, likely bleed-through from the reverse side of the page. The text is arranged in approximately 20 horizontal lines, though the characters are too light and faded to be transcribed accurately. Some faint words like "et", "in", and "de" are visible.



JB 4295

ULB Halle
001 517 694

3



JA 502

WOLFF



3833

Ein außzug etlicher

Practica vnd Propheceyen. Sibille.
Brigitte/Cirilli/Joachim des Aerts/Methodij/vñ Bruder Reins
hartz/wirt weren noch etlich jar/vñ sagt vō wunderlichē dingen.

